



**TALKING POINTS UCAPAN YAB MENTERI BESAR  
SEMPENA PROGRAM  
BERSAMA NGO CINA DAN INDIA DI  
DEWAN KOMUNITI 1MALAYSIA, CHEMOR, IPOH  
AHAD, 31 JULAI 2022**

Assalamualaikum Wbt dan Salam Perak Sejahtera

**[SALUTASI]**

- Pertama, saya mengucapkan terima kasih kepada seluruh pemimpin dan ahli NGO yang sudi meluangkan masa hadir untuk menjayakan pertemuan kita pada petang ini.
- Terima kasih dan penghargaan juga kepada semua pihak yang sama-sama bertungkus-lumus mengatur, menyusun dan memastikan perjalanan program pada pagi ini berjalan lancar seperti yang dirancang.

Hadirin yang dikasihi sekalian,

## **CABARAN PASCA COVID-19**

- Hari ini genap tiga bulan kita memasuki fasa endemik selepas lebih dua tahun hidup dalam suasana sukar pandemik COVID-19.
- Namun, saya nasihatkan diri dan kita semua untuk terus berjaga-jaga dengan menjaga SOP, lebih-lebih lagi dalam keadaan masih ada kes-kes jangkitan baru dilaporkan.
- Walaupun masih terdapat kes-kes jangkitan, namun secara keseluruhannya, rakyat sudah kembali kepada kehidupan biasa.
- Fasa pemulihan atau *recovery* yang dilaksanakan kerajaan membolehkan lebih banyak kegiatan ekonomi dapat dilaksanakan semula.
- Walaupun berdepan pelbagai cabaran sepanjang pandemik, **Perak merupakan antara lima negeri yang merekodkan prestasi KDNK lebih baik berbanding pencapaian peringkat nasional iaitu pada kadar 3.5 peratus pada tahun 2021.**
- Pada masa sama, fasa pemulihan juga membolehkan kegiatan ekonomi rakyat menjadi semakin baik.
- Namun, **kita mesti bersedia** menghadapi pelbagai cabaran dan kemungkinan pasca COVID. Antaranya:

- i) Krisis kesihatan boleh berlaku semula pada bila-bila masa.
  - ii) Ekonomi negeri mesti dipacu dengan teknologi khususnya teknologi digital. Jika tidak kita akan ketinggalan.
  - iii) Memulihkan semula sistem pendidikan kerana ramai anak-anak kita masih terkesan.
  - iv) Isu sekuriti makanan yang semakin meruncing
- Sebagai kerajaan, saya dan rakan-rakan berusaha untuk belajar dan mengadaptasi pengajaran-pengajaran daripada pandemik COVID:
    - i) Sistem penyampaian perlu diperkemas dan diperkukuh. Perlu berpaksikan data
    - ii) Melestarikan pembangunan ekonomi termasuk meneroka sumber baru
    - iii) Pentingnya pembangunan aspek kemahiran memandangkan banyak sektor pekerjaan yang terjejas
    - iv) Pendigitalan satu kemestian
    - v) Kestabilan dalam kerajaan

## **MERANGKA PELAN PEMBANGUNAN**

- Atas kesedaran itu, antara perkara pertama yang saya lakukan sebaik menjadi Menteri Besar ialah menggerakkan usaha kerajaan untuk mewujudkan sebuah pelan pembangunan strategik yang dipanggil **Perak Sejahtera 2030**.

- Ia penting bukan sahaja untuk menghadapi impak COVID-19, tetapi juga untuk kita mendepani pelbagai cabaran-cabaran baru dalam jangka masa pendek, sederhana dan jangka panjang.
- Saya dan rakan-rakan turun padang ke setiap mukim dan daerah dan bertemu dengan pelbagai lapisan rakyat untuk mendapatkan input bagi merangka pelan ini.
- Kita mengambil masa lebih setahun mengumpul input-input daripada pelbagai golongan - orang muda, pesara kerajaan, kakitangan awam dan swasta, para guru, petani, penternak dan nelayan, peniaga dan usahawan kecil sehinggalah pemimpin setempat, sama ada di kota ataupun desa.
- Setakat ini, sebanyak **129 sesi libat urus** telah dilaksanakan oleh IDR dengan pelbagai pihak untuk mengumpul pandangan rakyat untuk memeta Perak Sejahtera 2030.
- Kerana saya tidak mahu pelan ini hanya sempurna di atas kertas sahaja. Bahkan saya ingin pastikan ia memanfaatkan seluruh warga negeri Perak, tanpa mengira garisan kaum dan agama.

## **PERAK SEJAHTERA 2030**

- Justeru, pada 15 Jun lalu, saya telah melancarkan pelan pembangunan Perak Sejahtera 2030 yang akan memandu arah jentera pentadbiran Kerajaan Negeri dalam tempoh lapan tahun akan datang dengan **matlamat “Perak Makmur, Rakyat Sejahtera”**,

- Dengan tujuan “Memacu Pembangunan Sosioekonomi yang Mapan, Inklusif dan Dinamik”, pelan ini menggariskan **ENAM** (6) agenda:
  - I. Sekuriti Makanan
  - II. Memacu Ekonomi Digital
  - III. Pembuatan Keputusan Berpacukan Data
  - IV. Perak Koridor TVET Malaysia
  - V. Perlombongan Lestari dan
  - VI. Tadbir Urus Projek Berkepentingan Negeri.
  
- Dengan menetapkan TIGA (3) sasaran iaitu Sejahtera Sosial, Sejahtera Ekonomi dan Sejahtera Politik, Perak Sejahtera 2030 menggariskan **5** prinsip yang memandu arah jentera kerajaan dalam pembangunan negeri sepanjang tempoh lapan tahun akan datang. Lima prinsip itu ialah:
  - I. Keseimbangan Pembangunan Fizikal Dan Sosioekonomi
  - II. Kerjasama Pintar
  - III. Kelestarian Penggunaan Sumber Dan Alam Semula Jadi
  - IV. Sistem Penyampaian Perkhidmatan Yang Cepak Dan Ambil Peduli
  - V. Kepakaran Berkualiti Dan Bernilai Tinggi

## 18 PROGRAM FLAGSHIP PERAK SEJAHTERA

- Bagi mencapai agenda dan sasaran yang ditetapkan dalam Perak Sejahtera 2030, 18 program Flagship dilaksanakan yang merupakan **sinergi antara kerajaan, GLC dan agensi-agensi negeri.**
- Kesemua 18 program ini bukan sahaja menjadi pemangkin kepada misi mensejahterakan rakyat, tetapi turut memberi nilai tambah kepada projek keutamaan yang akan diterajui agensi negeri dan persekutuan.

Flagship 1 - Lembah Bakul Makanan (Sekuriti Makanan)

Flagship 2 - Perumahan Sejahtera

Flagship 3 - Perlombongan Mampan

Flagship 4 - Koridor TVET Malaysia

Flagship 5 - Program Pemboleh Daya Modal Insan dan Pembelajaran Sepanjang Hayat

Flagship 6 - Membasmi Miskin Tegar 2025

Flagship 7 - Program Menyantuni Golongan Rentan

Flagship 8 - Agenda Perak Sihat Sejahtera

Flagship 9 - Program Mesra Pelabur

Flagship 10 - Ekonomi Pengalaman

Flagship 11 - Ekonomi Digital Negeri Perak

Flagship 12 - Sumber Air dan Sumber Tenaga Boleh Baharu

Flagship 13 - Hab Maritim & Pelabuhan Nusantara

Flagship 14 - Pusat Kecemerlangan Balai Cerap Negara

Flagship 15 - Ipoh Bandar Ekonomi Donat 2027

Flagship 16 - SMART Perak

Flagship 17 - Komuniti Perak Sejahtera

Flagship 18 - Santuni Orang Asli

## **PERANAN NGO MENJAYAKAN PERAK SEJAHTERA**

- Secara umum, setiap lapisan rakyat mempunyai peranan penting dalam menjayakan setiap agenda dalam Perak Sejahtera.
- Namun untuk hari ini, saya hendak menyentuh mengenai peranan yang boleh dimainkan oleh para NGO untuk menjayakan agenda **membina komuniti sejahtera** khususnya melalui beberapa program flagship yang sedang dan akan dilaksanakan.

### *Flagship Komuniti Perak Sejahtera*

- Dilaksanakan melalui aktiviti berteraskan kesukarelawanan. Antara program yang telah dirancang ialah:

#### **i) Komuniti Rukun Tetangga**

Projek ini mewujudkan kesatuan dalam organisasi sedia ada dalam sesuatu kawasan. Selain itu, aktiviti-aktiviti kemasyarakatan juga akan dilaksanakan bagi mengukuh semangat perpaduan, keharmonian, kerjasama, kebajikan, kesihatan, kesejahteraan ekonomi dan kualiti hidup dalam kalangan masyarakat.

**ii) Skuad Perak Sejahtera**

penubuhan skuad ini bertujuan memupuk semangat kesukarelawanan dengan bertindak sebagai agen kerajaan di lapangan dalam melaksanakan kerja kebajikan kepada masyarakat yang memerlukan. Skuad ini akan menjadi payung kepada pasukan sukarelawan sedia ada di negeri ini. Sukarelawan akan diperkasa melalui latihan yang bersesuaian untuk terus memberi khidmat bakti kepada masyarakat. Lebih menarik, skuad ini akan diwujudkan di setiap Dewan Undangan Negeri (DUN).

**iii) Celik Negara**

Dilaksanakan untuk memberi pendedahan kepada masyarakat mengenai literasi demokrasi dalam aspek mendidik kematangan politik dalam kalangan belia yang menjadi tunjang kepada pembangunan negeri akan diberikan melalui projek ini. Projek ini turut mengambil peluang untuk memfokuskan elemen pendigitalan dengan memberi pendedahan terhadap kepentingan pengaplikasian media sosial untuk menghebahkan maklumat berkaitan negeri sejajar dengan matlamat pelan Perak Sejahtera 2030.



### *Flagship Menyantuni Golongan Rentan*

- Terdapat lima program di bawah Flagship ini;

**i) Bandar Mesra Usia**

Ia merupakan satu instrumen yang menggabungkan peranan setiap individu dalam komuniti dan masyarakat setempat agar persekitaran yang didiami bebas halangan dan selamat di samping mewujudkan sistem sokongan yang berkesan untuk semua pihak.

**ii) Program Sanjung**

Program ini akan menggunakan elemen inovasi sosial dalam menjamin timbal balas ekonomi kepada negeri. Matlamat utama program ini adalah untuk meningkatkan jaringan keselamatan sosial warga tua.

Antara projek yang disarankan adalah pemberian insentif baucar kepada ibu bapa sebagai galakan keluarga berbelanja dalam negeri.

**iii) Program Kepimpinan dan Ikhtisas Wanita**

Projek ini diusulkan untuk memperkasa dan membangunkan keupayaan wanita sebagai sumber insan penting dalam pembangunan keluarga dan masyarakat di negeri Perak. Peneraju bagi program ini ialah Kementerian Pembangunan Wanita, Keluarga dan Masyarakat, Sekretariat Pembangunan Wanita dan Masyarakat (SPW) dan Institut Darul Ridzuan (IDR).

Suka sekiranya, puan-puan melalui NGO masing-masing untuk sama-sama menyumbang ke arah ini.

**iv) Majlis Tindakan Ekonomi OKU (MTOP)**

Diusulkan sebagai platform untuk menggerakkan pelaksanaan dasar dan inisiatif mesra OKU di negeri Perak. Majlis ini akan memfokuskan aktiviti-aktiviti berkaitan penguatkuasaan dan penggubalan dasar-dasar baharu, pemerkasaan OKU dan program kesedaran kepada masyarakat dan pemegang taruh.

**v) Data Wanita, OKU dan Warga Tua**

*Program Flagship Pemboleh Daya Modal Insan dan Pembelajaran Sepanjang Hayat*

- Program ini diadakan bagi menaik taraf kehidupan masyarakat daripada segi ekonomi dan sosial sekali gus mewujudkan peluang yang adil dan saksama kepada semua lapisan masyarakat.
  
- Program flagship ini menawarkan program berikut:
  - I. **1 Warga, 1 Skill;**

Projek ini beriltizam untuk memperkasa latihan dalam bidang teknikal dan profesional supaya lebih ramai masyarakat menjadi pakar dalam pelbagai bidang dan menguasai kemahiran kerjaya masa hadapan.
  
  - II. **1 Keluarga, 1 Ijazah;**

Projek ini bertujuan menggerakkan inisiatif menjadikan pendidikan sebagai kunci keluar daripada cengkaman kemiskinan. Pelbagai pendekatan akan dilaksanakan termasuk memberi kesedaran kepada ibu bapa mengenai kepentingan pendidikan kepada anak-anak dan memberi pendedahan bersasar kepada belia B40 mengikut kecenderungan dan minat.

**III. 1 Keluarga, 1 Usahawan;**

Projek ini menggalakkan belia untuk melibatkan diri dalam bidang keusahawanan, khususnya belia yang mempunyai sijil kemahiran asas daripada institusi latihan atau pusat kemahiran tempatan bagi menaik taraf hidup dan ekonomi setempat.

**IV. 1 Daerah, 1 Aktiviti Ekonomi;**

Projek ini dilaksanakan untuk pembangunan ekonomi yang dijalankan berdasarkan komuniti setempat. Ia boleh memberi manfaat langsung berasaskan produk unik yang beridentiti sesebuah daerah di samping melonjakkan produk setempat sebagai industri yang berdaya maju seiring dengan pembangunan usahawan yang berdaya saing.

**V. 1 DUN, 1 Pusat Digital Ekonomi (PEDi).**

Projek ini akan membuka peluang kepada masyarakat untuk melibatkan diri dalam sektor ekonomi digital.

## **KESTABILAN DAN PERPADUAN KUNCI KEJAYAAN**

- Seperti yang sering saya sebutkan, kejayaan pelan Perak Sejahtera bergantung kepada komitmen kita semua sebagai rakyat Perak.
- Pelan ini tidak bersifat statik, tetapi dinamik dengan mengambil kira perkembangan dan situasi semasa. Ia memerlukan komitmen berterusan kerajaan.
- Sehingga kini, proses libat urus masih dijalankan. Kolaborasi antara Negeri dan Persekutuan terus dilakukan untuk pastikan setiap perancangan dalam pelan ini dapat sama-sama dijayakan.
- Saya harap tuan-tuan dan puan-puan terus memberi sokongan dan dokongan kepada kerajaan negeri yang ada pada hari ini untuk meneruskan dan menjayakan apa yang telah sama-sama kita mulakan.

## **PENUTUP**

- Perak Sejahtera bukan karya Saarani Mohamad. Bukan cita-cita saya sebagai Menteri Besar. Bukan juga karya barisan Exco dan jentera pentadbiran. Pelan ini adalah cita-cita kita semua sebagai rakyat Perak yang mahukan sebuah negeri yang makmur dan sejahtera.
- Ia digarap dengan begitu teliti dengan mengambil kira pandangan segenap lapisan rakyat tanpa mengira kaum dan agama. Memeta pelan ini tidak mudah, dan sudah tentu melaksanakannya juga tidak akan pernah mudah.
- Saya mengajak rakan-rakan NGO untuk bersama-sama dalam menjayakan setiap hasrat murni yang digarap dalam pelan ini. Untuk kita sedaya upaya membina negeri yang makmur, stabil dan berjaya untuk masa depan anak-anak kita.